

Na osnovu člana 16. Zakona o upravi („Službeni glasnik Bosne i Hercegovine“, broj 32/02, 102/09 i 72/17), člana 48. alineja 2) Okvirnog zakona o visokom obrazovanju u Bosni i Hercegovini („Službeni glasnik Bosne i Hercegovine“, broj 59/07 i 59/09), člana 7. tačka a) i člana 12. tačka b) Statuta Agencije za razvoj visokog obrazovanja i osiguranje kvaliteta Bosne i Hercegovine („Službeni glasnik Bosne i Hercegovine“, broj 86/09), direktor Agencije za razvoj visokog obrazovanja i osiguranje kvaliteta Bosne i Hercegovine, uz saglasnost Upravnog odbora Agencije, sa 1. sjednice, održane 17.02.2023. godine, donosi

**ODLUKU O KRITERIJIMA ZA IZBOR DOMAĆIH I
MEĐUNARODNIH STRUČNJAKA KOJI DAJU OCJENU I
OBAVLJAJU REVIZIJU KVALITETA I DAJU PREPORUKE O
AKREDITACIJI VISOKOŠKOLSKIH USTANOVA I STUDIJSKIH
PROGRAMA**

**Član 1.
(Predmet)**

Ovom odlukom utvrđuju se kriteriji za izbor domaćih i međunarodnih stručnjaka koji daju ocjenu i obavljaju reviziju kvaliteta i daju preporuke o akreditaciji visokoškolskih ustanova i studijskih programa u Bosni i Hercegovini (u daljem tekstu: stručnjaci), način njihovog izbora putem javnog konkursa i način objavljivanja konkursa, odabir stručnjaka u posebnim slučajevima, sadržaj liste stručnjaka, obaveze stručnjaka, način ažuriranja liste stručnjaka i prestanak statusa stručnjaka.

**Član 2.
(Kategorije stručnjaka)**

Stručnjaci u smislu ove odluke su:

- a) stručnjaci - predstavnici akademske zajednice u Bosni i Hercegovini;
- b) stručnjaci - predstavnici privrede i prakse;
- c) međunarodni stručnjaci;
- d) stručnjaci-studenti.

**Član 3.
(Kriteriji za odabir stručnjaka - predstavnika akademske zajednice u BiH)**

Kriteriji za odabir stručnjaka - predstavnika akademske zajednice u Bosni i Hercegovini su:

- a) izbor u naučno-nastavno zvanje u relevantnoj naučnoj/umjetničkoj oblasti, koje je dodjelila akreditirana visokoškolska ustanova.
- b) iskustvo u nastavno-naučnom i istraživačkom radu,
- c) znanje engleskog jezika,
- d) znanje rada na računaru,
- e) mlađi od 65 godina.

Član 4.
(Kriteriji za odabir stručnjaka – predstavnika privrede i prakse)

Kriteriji za odabir stručnjaka – predstavnika privrede i prakse:

- a) minimalno visoka stručna sprema, odnosno nivo 7 kvalifikacije prema „Osnovama kvalifikacionog okvira u Bosni i Hercegovini“,
- b) najmanje pet godina radnog iskustva, u djelatnosti koja pripada ili je srodna određenoj naučnoj, odnosno umjetničkoj oblasti za koju se prijavljuje,
- c) znanje engleskog jezika,
- d) znanje rada na računaru,
- e) mlađi od 65 godina.

Član 5.
(Kriteriji za odabir međunarodnih stručnjaka)

(1) Međunarodni stručnjaci se prijavljuju na javni konkurs kao međunarodni stručnjaci predstavnici akademske zajednice ili međunarodni stručnjaci predstavnici privrede i prakse.

(2) Kriteriji za odabir međunarodnih stručnjaka predstavnika akademske zajednice su:

- a) izbor u naučno-nastavno zvanje u relevantnoj naučnoj/ umjetničkoj oblasti, koje je dodjelila akreditovana visokoškolska ustanova,
- b) iskustvo u nastavno-naučnom i istraživačkom radu,
- c) znanje engleskog jezika,
- d) znanje rada na računaru,
- e) mlađi od 65 godina

(3) Kriteriji za odabir međunarodnih stručnjaka predstavnika privrede i prakse:

- a) minimalno visoka stručna sprema,
 - b) najmanje pet godina radnog iskustva u djelatnosti koja pripada ili je srodna određenoj naučnoj, odnosno umjetničkoj oblasti za koju se prijavljuje,
 - c) znanje engleskog jezika,
 - d) znanje rada na računaru,
- mlađi od 65 godina.

Član 6.
(Kriteriji za odabir stručnjaka – studenata)

(1) Kriteriji za odabir stručnjaka iz kategorije studenata su:

- a) student I, II ili III ciklusa studija na akreditovanoj visokoškolskoj ustanovi,
- b) minimalni prosjek ocjena 8,0 ili 3,5,
- c) znanje engleskog jezika,
- d) znanje rada na računaru.

Član 7.
(Način izbora)

- (1) Izbor stručnjaka vrši se putem javnog konkursa.
- (2) Odluku o raspisivanju javnog konkursa za izbor stručnjaka donosi direktor Agencije.
- (3) Javni konkurs za izbor stručnjaka raspisuje se u pravilu svake godine.
- (4) Javni konkurs se raspisuje po naučnim /umjetničkim oblastima.
- (5) U slučaju kada Agencija utvrdi da na listi stručnjaka iz određene kategorije stručnjaka, određene naučne ili umjetničke oblasti, postoji nedovoljan broj stručnjaka, provede će proceduru javnog konkursa samo za tu kategoriju stručnjaka, odnosno izbor stručnjaka za određenu naučnu/umjetničku oblast.

Član 8.
(Objavljivanje javnog konkursa)

- (1) Javni konkurs se objavljuje na web stranici Agencije, a obavještenje o raspisivanju javnog konkursa se objavljuje u trima visokotiražnim dnevnim novinama čija se distribucija vrši na cijeloj teritoriji Bosne i Hercegovine.
- (2) Prijavljivanje na javni konkurs vrši se dostavljanjem popunjenog obrasca prijave koji je dostupan na web stranici Agencije.
- (3) Rok za prijavu kandidata na javni konkurs je 30 dana od dana objavljivanja obavještenja o raspisivanju javnog konkursa u dnevnim novinama, a ukoliko obavještenje o raspisivanju javnog konkursa nije objavljeno isti dan u trima visokotiražnim novinama, rok se računa od dana objavljivanja obavještenja u dnevnim novinama koje su posljednje objavile obavještenje.

Član 9.
(Izbor stručnjaka u izuzetnim slučajevima)

- (1) U izuzetnim slučajevima, kada se u toku provođenja procedure javnog konkursa utvrdi da nije bilo prijavljenih kandidata za određenu naučnu ili umjetničku oblast, odnosno ako na važećoj Listi stručnjaka nema izabranog domaćeg ili međunarodnog stručnjaka iz određene naučne/umjetničke oblasti, Agencija može na osnovu poziva, u saradnji sa agencijama iz inostranstva, imenovati stručnjaka za postupak vanjskog osiguranja kvaliteta.
- (2) Stručnjak imenovan na način iz stava (1) ovog člana za vrijeme rada u Komisiji ima ravnopravan status sa stručnjacima koji se nalaze na Listi stručnjaka.

Član 10.
(Sadržaj Liste stručnjaka)

- (1) Lista stručnjaka u zavisnosti od kategorije stručnjaka sadrži podatke za:
 - a) predstavnike akademske zajednice: ime i prezime, izbor u zvanje za užu naučnu/umjetničku oblast, naziv visokoškolske ustanove u kojoj je zaposlen ili je angažovan po drugom osnovu u nastavno-naučnom procesu, iskustvo u obukama i učešću u komisijama za akreditaciju u Bosni i Hercegovini ,
 - b) predstavnike privrede i prakse: ime i prezime, stečena kvalifikacija, naziv institucije u

kojoj je zaposlen ili je bio zaposlen, radno iskustvo, iskustvo u obukama i učešću u komisijama za akreditaciju,

- c) predstavnike studenata: ime i prezime, ciklus studija, naziv visokoškolske ustanove, naziv studijskog programa, iskustvo u obukama i učešću u komisijama za akreditaciju,
- d) međunarodne stručnjake predstavnike akademske zajednice: ime i prezime, država, izbor u zvanje za užu naučnu/umjetničku oblast, naziv visokoškolske ustanove u kojoj je zaposlen ili je angažovan po drugom osnovu u nastavno-naučnom procesu, iskustvo u obukama i učešću u komisijama za akreditaciju visokoškolskih ustanova u Bosni i Hercegovini, a za međunarodne stručnjake privrede i prakse: ime i prezime, država, naziv institucije gdje je zaposlen ili je bio zaposlen, ili je radno angažovan po drugom osnovu, iskustvo u obukama i učešću u komisijama za akreditaciju u Bosni i Hercegovini.

(2) Listu stručnjaka iz stava (1) vodi Agencija u papirnoj i elektronskoj formi uz poštivanje odredbi Zakona o zaštiti ličnih podataka.

Član 11. **(Važenje Liste stručnjaka)**

Sve do okončanja konkursne procedure i usvajanja Liste od strane nadležnih obrazovnih organa u Bosni i Hercegovini i nadležnog odjela Brčko Distrikta Bosne i Hercegovine, ranije utvrđena Lista stručnjaka ostaje važeća.

Član 12. **(Obaveze stručnjaka)**

- (1) Stručnjaci su obavezni obavještavati Agenciju o svim promjenama podataka koje su dostavili Agenciji prilikom učešća na konkursu, a koji se odnose na:
 - a) napredak u karijeri/izbor u više akademsko zvanje,
 - b) prelazak na drugu visokoškolsku ustanovu,
 - c) promjenu poslodavca,
 - d) novo iskustvo u eksternoj evaluaciji u inostranstvu,
 - e) stručnjaci iz kategorije studenti, početkom školske godine dokaz o kontinuiranom studiju ili dokaz o prestanku statusa studenta,
 - f) promjenu ličnog imena ili prezimena, adrese i sl.
 - g) odlazak u penziju.
- (2) Obavještavanje Agencije o promjeni podataka iz stava (1), vrši se u roku od 15 dana od dana nastale promjene, pisanim putem ili elektronski, uz dostavljanje odgovarajućih dokaza.
- (3) Stručnjaci su obavezni da prisustvuju svim vidovima edukacije koje će organizovati Agencija, samostalno ili u saradnji sa nadležnim obrazovnim vlastima.

Član 13.
(Način ažuriranja Liste stručnjaka)

- (1) Agencija vrši ažuriranje Liste stručnjaka svakih šest mjeseci, a po potrebi i češće.
- (2) Ažuriranje Liste stručnjaka Agencija vrši po službenoj dužnosti, na način da u cilju utvrđivanja eventualne promjene podataka koji su određeni u članu 12. stav (1) ove odluke, kontaktira stručnjake putem e-maila ili telefona.
- (3) Ukoliko stručnjaci obavijeste Agenciju o promjeni podataka ili Agencija dođe do saznanja da je došlo do promjene određenih podataka koji čine sadržaj Liste stručnjaka, Agencija će izvršiti izmjenu, ispravku ili dopunu podataka ili ukoliko postoje razlozi za prestanak statusa stručnjaka, izvršiće brisanje stručnjaka sa Liste stručnjaka.

Član 14.
(Prestanak statusa stručnjaka)

- (1) Status stručnjaka koji se nalazi na Listi stručnjaka prestaje:
 - a) na njegov lični zahtjev;
 - b) prestankom statusa studenta, s tim da, izuzetno, student stručnjak imenovan kao član komisije koja je već obavila posjetu visokoškolskoj ustanovi u postupku akreditacije, bez obzira na prestanak statusa studenta ima obavezu da ostane član komisije do okončanja postupka akreditacije;
 - c) neopravdanim odbijanjem učešća u komisiji stručnjaka;
 - d) ukoliko se utvrdi da je tokom procesa akreditacije stručnjak postupio na način koji narušava kvalitet procesa i ugled stručnjaka, dostavljeni lažni podaci u prijavnom obrascu, vrijeđa uposlenike Agencije i Agenciju kao instituciju i druge učesnike u postupku;
 - e) ukoliko ne ispoštuje obaveze predviđene rješenjem o imenovanju komisije stručnjaka i ostale procedure propisane za postupak akreditacije visokoškolskih ustanova i studijskih programa;
 - f) ukoliko protiv njega bude pokrenut postupak nadležnog tijela u vezi sa radom u Komisiji stručnjaka;
 - g) neopravdanim izostankom dva puta uzastopno sa obuke stručnjaka koje organizuje Agencija u saradnji sa nadležnim obrazovnim organima;
 - h) neobavještanjem Agencije o promjenama podataka iz člana 12. stav (1) u roku od 15 dana;
 - i) odlaskom stručnjaka u penziju, odnosno kada stručnjak navrší 65 godina života
 - j) smrću stručnjaka,
 - k) donošenjem odluke nadležnog organa o narušavanju akademskog integriteta (npr. da je izvršio koruptivno-kriminalne radnje, seksualno napastovanje, zloupotrebu položaja, plagiranje knjiga i radova).
- (2) Agencija na osnovu pribavljenih podataka o razlozima prestanka statusa stručnjaka ili na lični zahtjev stručnjaka, briše stručnjaka sa liste.

Član 15.
(Stupanje na snagu)

- (1) Ova odluka stupa na snagu danom donošenja i objavljuje se u „Službenom glasniku Bosne i Hercegovine“.
- (2) Stupanjem na snagu ove odluke, prestaje da važi Odluka o kriterijima za izbor domaćih i međunarodnih stručnjaka koji daju ocjenu i obavljaju reviziju kvaliteta i daju preporuke o akreditaciji visokoškolskih ustanova i studijskih programa („Službeni glasnik Bosne i Hercegovine“, broj 2/18 i 6/19).

Broj:05-02-2-140-1/23
23.mart 2023.godine
Banja Luka

D I R E K T O R
Prof. dr **Enes Hašić**,s.r.